

Gränzgaenger



Fasnacht 2018

„ Mir rytte ainewääg“ !

(Dierschitzer wänn Pfäard an dr Fasnacht verbiete-
mir hätte e Leesig!)

Wär ryytet so spoot dur Nacht und Wind ?
Zwai Clique-Vorrytter mit fyrrrotem Grind !
Si hänn kai Rolle im Film vo Wells Fargo,
si rette d Ross vor em Fasnachts-Embargo !

My Frind, was hesch sone Sauwuet im Gsicht ?
Jä, sehsch Du die Dierschitzer nit, die Wicht !
Die wo d Tradizioon bekämpfe,
und unseri Fasnachtsfraid wänn dämpfe;
wo maine, alli Ressleri llyde,
und miesste dorum d Fasnacht myyde ?

Ross an dr Fasnacht – das isch woor –
gits z Basel scho lang - iber 100 Joor !
Und wär will jetz - do hols dr Gugger-
uns d Ross verbiete ? E Basler Schugger !!
Im Elsass heert me : Nom-de-cheval,
ces Demo-Papillons gheere in Stall !

In Ziri het e Studie belait,
ass bim Böög e Ross dr Schtress vertrait !
Mien mir uns würckkli soo schüüüli blamiere,
und fir d Fasnacht Böögge-Ross angaschiere ?
Selle Wäage, Scheese und Kaare,
nur elektrisch an uns durefaare ?

Mir finde s no 70 Joor Fasnacht nit toll !
Politisch korräggt: Mir hänn d Nase jetz voll !
E Pfäard spyyrt s Glyych in syne Nüschtere,
drum wänn mir ihne in d Nüschtere flüschtere,
ass si - wie mir - unsri Fasnacht verschteen,
sich nit ins Boggshorn jaage leen,
worum si am Cortège neetig sin,
mit Rytter oder mit Rytterin,
und au als Ressleri vonere Scheese,
sich nit leen vo dr Scheese leese !

Me weiss , dass die wo d Ressleri halte
si gärn hän, Vorsicht dien lo walte,
si guet uf d Fasnacht vorberaite,
und am Cortège schträng beglaite !
Wär muess me jetz vor wäm beschitze ?
Und wo duet dr gsund Dierverschand sitze ?

Die Froog beantworte mir, samt Boss,
anschtatt mit dierschutgschädigte Ross,
mit artgrächt dressierte Stäggepfäard !
So bhalte mir unseri Fasnachts-Wärt !

Ihr Dierschitzer, machet joo kaini Pflänz ,
e jedes Ross het sy Lizänz,
isch bim Comité regischtriert,
und d Gsundhait ärztlich atteschtiert !
Und jeede Rytter – merggsch es gly –
het en Abo fir d Psychiatrie !
Dert kennte mir Eych kenneleere
ohni Eyre Ross-Fruscht z steere !
Hesch no nie ebbis gheert vo Wält-Kultuur,
gang d Unesco go frooge, Banause-Buur !

Flischtere hilft nit nur bi Pfärd !
Im Bett wird gflischteret, au uff em Märt !
Und vyyle Politiker sett me – subtyyl ! –
ebbis flischtere - nur nitzt s nit vyl !
Aber dert wo s Flischtere gar nyt mee nutzt,
muess Glaartäggscht ane, wo d Kuttle butzt !

Im iberzellige Baudep-Tross
sitzt äin, wo grinst, uff em ganz hohe Ross !
Bim Wessels ergeret s aim am maischte,
ass är sich dr Ruggdritt nit ka laischte!
Isch sy Styrygäld-Million e Verpflägigs-Pauschale ?
Denn müesst är syni Feschter im Elsass nie zahle !
In Basel sett so ain in Baize und Gärte
nie mee yne- , und iberall ussgloo wärde !

Flischtere Politiker rächts, grien oder root ?
S kunnt uus bim suffe im Grosse Root.

D BVB flischteret nit, aber gyxt und gyyrt,
Nur dr 3er no St. Louis faart neyschtens wie gschmiirt !

Mit „Basel erfahren“ schynt d Stadt als wie gresser,
„Lass alle Hoffnung fahren“ träf d Wooret vyl besser!
In Sicht isch aber e Rächtsumkeer,
drno flischteret s mehr fair mit Hunkelêr !

Dr Fährima flischteret, wenn är s Grossbasel gseht,
und luegt zur Medizin- Fakultet.
Noo tuusig mool s Fähriseil keere, froggt er:
wird ich jetz ändlig Ehredoggtter ?

D Frau Fasnacht sait glaar: e Ross-Kur gits nit ,
die Pfäard sinn Kultur-Erb –kasch mache, was d witt !
Do froggt in Lieschtel e Rössli-Buur,
sy mir au, wie d`Noochbere, Wältkultuur ??



Vom Määntig znacht bis am Mittwoch demoorge kasch
uff em Minschterplatz und em Kasärnen-Areal d`Ladärne-
d`Waagen- und Requisiyten-Uustellig go aaluege!

Kumm doch au in unsere Glygge-Käller
an dr Theaterstrooss 20

www.graenzgaenger.ch